

## ASUAN-MKPASIP YE MKPASIP

Matthew 13:1-23

ỌYỌHỌ UKPEP-ŃKPỌ 75

Eke Mkpawara

**IKỌ IBUOT:** “Kpukpru ńkọk ke idem Mi eke mińwumke mfri, Enye osibe efep; ndien kpukpru ńkọk eke ońwumde mfri, Enye ọdiọń, man ońwum mfri awak akan” (John 15:2).

### Ubom Nte Ebiet-ukwọrikọ

Ediwak owo ema ebono ke ńkpań-utoń ndikop mme ikọ Jesus. Mme ńkpọ emi Enye ekekepepe ema enyene ukpọhọre ye mme ńkpọ efen emi mmọ ekesikopde; ndien mbon mbume ema edi, ntre ńko ke mmọ emi ekeneńere de enyene nsat-itọń akpanikọ. Ata ediwak owo ema edi ndien etie nte ufań ikoduhe inọ mmọ ke ufọk. Edi Jesus okoyom kpukpru owo ekop mme ikọ eke Imọ itińde, ntre ke Enye ọkọsuhọre aka ke mben inyań onyuń osuhọre etie ke ubom, oyom usuń esisit ọkpọń isọń, man oto do kpukpru owo ekpekut Enye enyuń ekop mme ikọ uwem Esie.

Jesus ekesiwak ndika ke itie-ukpono Abasi mme Jew ke usen Sabbath ndikwọrọ ikọ nnọ mme owo, edi Enye ikesibetke tutu eboho nte ufọk-Abasi mbemiso Enye ọtọńọ mme ukwọrọ-ikọ Esie. Itie kiet ekededi emi Jesus ekesikade, Enye ekesikpep mme owo ńkpọ ke enyoń obot, ke ańwa urua ye ke mben inyań. Enye ama esikwọrọ ọńọ mme akamba otu ye otu owo emi ekekopde Ukwọrọ-ikọ Esie ke Enyoń-obot; midighe Enye ọkwọrọ ọńọ owo kiet, nte uwut-ńkpọ, ke ini emi Enye ọkọkwọrọde ọńọ ńwan oro ke mben obube-mmọń Samaria. Enye ikayakke ifet ndomo kiet ebe ke nditiń nnọ owo usuń nte akpasańade osim Heaven.

### Uwem Anditiene-Christ Ke Usen Ke Usen

Nte nnyin ikpebet tutu ufọk-Abasi ke usen-ubọk Usen-Ọbọń ndien nnyin iwut ido ukpono Abasi nnyin? Nte nditọwọń emi esańade kiet eka ufọk-ńwed efiọk ete afo edi anditiene-Christ oto ke uwem emi afo odude ke urua ke urua? Akpana nnyin ibeńe idem kpukpru ini nditiń ikọ mbańa Andinyańa nnyin, edi “se ifọnde ikan edititiń edi ndidu uwem mbuotidem ye akpanikọ”. Owo emi enyenede ima Abasi emi ayamade ke uwem esie ididuhe ke otu isen-owo ibighi tutu owo obup enye abańa ido-ukpono Abasi esie. Mbon ererimbot esisọp eti-eti ndifiọk mbańa ata eyen Abasi. Edieke owo ndomo kiet mifiọkke ibańa ido-ukpono Abasi fo, ọwọrọ ete ke enyene se idiọkde ke uwem fo.

### Ntak Emi Ekede Mme ńke

Ke ini otu owo ema ekeshọre etetie ndikop ikọ Jesus, Enye eketiń ikọ ke ńke ọńọ mmọ. Enam efiọk se ńke edide ete ke etiń ebańa ńkpọ isọń emi ayararede owut ńkpọ Obio-ubọń. Jesus okoyom kpukpru owo efiọk ebańa etop emi Enye akadade edi, edi Enye ama ọfiọk ete ke ndusuk mmọ idińwańake esit mmọ ndibọ akpanikọ Esie; ke ntre Enye ama anam ańwańa mbet Esie, ke ńke, ntak emi kpukpru owo midibọhọke.

Jesus eketiń ọńọ mme owo abańa mme ńkpọ emi odude ke edu-uwem mmọ ke usen ke usen, mme ńkpọ emi mmọ ekemedede ndifiọk. Afo eyeti abańa ini emi Enye ekemenerede ekikere mmọ owut ekpońidim. Mmọ ema ekop inem ke mbiet ińwań nte mmọ ekekerede ebańa ata uyai esie, nte ekeyede ndise, ediye usuń nte ekenamde enye emi Jesus eketińde ọńọ mmọ ama okpon akan kpukpru edisine-ńkpọ ubọń Edidem Solomon. Jesus eketiń owut ete ke mbiet ińwań ikanamke utom man enyene se adiade, me ndikere mbańa se edidiade, me se enye edisinede, kpa ye oro edisine-ńkpọ emi Abasi esinede enye eye adańa didie! “Edieke Abasi esinede mbiet ińwań ńkpọ ntem, ... nte Enye idisineke mbufo ńkpọ ikan, O mbufo nditọ ekpri mbuotidem?” emi ekedi ukpep-ńkpọ emi Andinyańa ekekepepe oto ke mbiet ińwań.

### Editọ Mme Mkpasip

Ke ini enye emi, Jesus eketiń ńke Asuan-mkpasip ye Mkpasip. Edi akpanikọ ete ke ediwak owo emi ekekopde ikọ Esie ema ewọrọ eka ye ekpat mkpasip ke ubọk kiet, enyuń esuan mkpasip ke anyan usuń ke ńkań ubọk eken nte etọde mkpasip. Edieke ekekerede mben ińwań, ńkpọ ikpanke ndusuk ndiduńọ ke usuń, me ke ikọt ńkukim, ndien mmọ kpukpru ekut nte inuen enyoń edide editań mme mkpasip oro mmọ ekutde. Jesus ama enyene ukpep-ńkpọ eke spirit ndikpep oto ke ńke emi ọńọ kpukpru owo emi edifiọkde se ọwọrọde, edi ye ediwak mmọ efen, emi ọkọwọrọ mbuk ikpikpu owo emi ọtọde mkpasip esie.

### Esit Emi Eberide

Ke emi ebede, ke ini Jesus okodude ye mbet Esie ikpọń mmọ ema ebup Enye ntak emi enye eketińde ke utọ usuń oro emi ediwak owo mikọfiọkke se mbuk oro ọwọrọde ke ńkań spirit. Jesus ama ọbọrọ mmọ ete kpukpru

ekpefiok edieke mmọ enyime, edi ndusuk owo ema eberi esit mmọ ebaha etop erinyaña ukpọn; ke ntak oro utọn mmọ ema edobi ndikop ikọ, enyin mmọ ema enyuñ ekim.

Abasi ama anam uduak erifak owo otim añwaña oro esin Isaiah etiñ ete, “Mbon isañ, idem mme anana ibuo, ididuehe” (Isaiah 35:8). Abasi oyom kpukpru owo edi etiene Imọ ye ñkabaresit, ndien ama ọnọ ata Uñwana. “Emi anamde enyin añwaña kpukpru owo okododuk ke ererimbot” (John 1:9). Jesus idinyañake owo ekededi eke miyomke erinyaña. Edieke owo ọsọnde esit ye Abasi, etop erinyaña edi ndisime ñkpọ ọnọ enye.

### **Eyarade Enọ Nnyin**

Nso utọ utibe ifet ke inyene tọnọ nte Jesus ekedi ndinam nnyin ifiok ibaña usuñ erinyaña ukpọn edieke nnyin idiwọnqrede itiene Enye. Jesus eketiñ ọnọ mbet Esie ete “Eyak enọ mbufo ndifiok ndibe ñkpọ Obio Ubọn Heaven.” Nnyin kpukpru imekeme ndidi mbet Esie, inyuñ ifiok mme ndibe-ñkpọ oro, edieke nnyin iyomde erinyaña.

Nte nnyin imenyene ifiok inyuñ inyime se oro ọwọrọde? Peter etiñ ọnọ nnyin ete, mme anditiñ ntiñ-nnim ikọ ema etim eyom enyuñ eduñore, enyuñ etiñ ebaña mfọn eke edidide ke ini Jesus edidide ndien ama ọdọn kpa idem mme angel ndinyuñ ñkpọ emi mfiok, (1 Peter 1:10-12). Ikayarakede inọ mmọ kaña, edi ndibe-ñkpọ Abasi ama ayarade ke ini mfọn ido Abasi ọnọ nnyin emi iditimde ikpañ utọn inọ Ikọ Abasi.

### **Mkpasip Emi Otode Heaven**

Ndien Jesus ama ayarade ñke Asuan-mkpasip ye Mkpasip. Enye ke Idemesie me, ọkwọrọ-ikọ emi eyọhọde ye Spirit Esie ke esasuan mkpasip Eti-mbuk emi otode ke Heaven. Mkpasip eketie ukem-ukem, kpukpru eketo ke Heaven. Nso idi ntak emi ndusuk eñwumde ediwak mfri, ke ini ndusuk miñwumke baba kiet? Edi isoñ ekedi ntak. Jesus ama anam añwaña ete ke isoñ akada ọnọ mme nsio-nsio owo emi ekopde, emi ekpañde utọn ekop ikọ erinyaña ukpọn.

Ndusuk mkpasip ekeduñọ ke mben usuñ ndien inuen enyọn etañ mmọ eta: Enye ikenyeneke ifet ndikọri. Enye akada oro odomo ye mme owo emi ekerede ebaña etop erinyaña nte ndisime ñkpọ emi ñko miyakke Ikọ oro oduk ke esit mmọ. Asua ukpọn mmọ anam mmọ efre ikọ oro ini kiet.

Ndusuk mkpasip ema eduñọ ke isoñ itiat. Afo ọmọfiok ete ñkpri mmeme oruñ eto ikemeke ndibe nduk ke itiat. Mkpasip emi ọtọnọ ndikọri ke ekpri isoñ emi okodorode ke enyọn itiat, edi ke ini oruñ atuahade ke itiat, mmọ ikemeke ndinyene mmọn me udia, ndien mme eto oro eyemere. Jesus akada editọ emi odomo ye mme owo emi ekopde etop Eti-mbuk enyuñ ebat ke utibe. Mmọ ekut iso nti mme anditiene-Christ nte ayamade, ye ebuana ọtọ kiet ke otu ufọk-Abasi Christ, ndien mmọ ekere ete ke mmimọ imoyom utọ idaresit oro ñko. Edi mmọ ikereke se idikpade mmọ ke ndidu uwem nnọ Christ. Mme ini eyedu emi mmọ edikutde ukọbọ ke ntak Ikọ Abasi; mme ini eyedu emi mmọ ke mbuotidem ediberede idem ọkpọsọn ke mme eñwọnọ Abasi. Ke ini emi mme utọ ini oro edide, mmọ emi ekerede ete ke uwem mme anditiene-Christ edidi mmemmem, eyekañ mbuotidem efiak etiene ererimbot.

Ndusuk mkpasip emedu emi ekeduñọde ke ikọt ñkukim. Mkpasip ema ekọri, edi ke ini mme eto ema ekekọri ebaha mmọ, oto ke ntak mbiet, Jesus ọkọdọhọ ete ke utọ mme eto oro ebiet mme owo emi ema ekenyaña, enyuñ enam ñkpọ Abasi ke ofuri esit ke esisit ini, edi nte osuk akade iso mmọ ekabare ekop inemesit ke abaña mme ñkpọ efen, enyuñ eyak spirit Abasi ọwọrọ ọkpọn uwem mmọ. Mmọ ema etim ebere ndinam ñkpọ nnọ Abasi, edi oto ke unana ntiñenyin ye edikpọn se ekpenamde, enyuñ esin idem ọkpọsọn ndinam mme ñkpọ ufọk mmọ me mbubehe idem mmọ, mmọ inyeneke ifet aba ndinam ñkpọ nnọ Jesus; ntre Enye enyene ndiwọrọ mkpọn mmọ.

### **Mfri**

Eti isoñ ama onyuñ odu ñko. Isoñ ama odu emi okoyomde mkpasip, ama onyuñ enyene kpukpru se mkpasip okoyomde man ọkọri ọfọn. Utọ oro edi mme esit emi ekopde biọn ke abaña mme Ikọ uwem, emi enyuñ enyime ndiyọ uñwana utin ye edim, ke ini oyobio ye emem, kpukpru ñkpọ emi edinamde mmọ edi nti mme anditiene-Christ. Mme oruk owo oro eñwum mfri ke Eti-mbuk, ndusuk ediwak, ndusuk esisit, nte ukeme mmọ edide, oro edi kpukpru mfri spirit, mme utọ owo oro idikpuhu Jesus ke ini Enye edide ndiyom mfri nto mmọ, koro mme nti ebek eyedu do, idighe ndiqi ikọn.

### **MME MBUME**

1. Nso idi ñke?
2. Nso idi ntak emi Jesus eketiñde ikọ ọnọ mme owo ke ñke?
3. Nso idi ntak emi kpukpru owo mikọfiokke mme ñke emi Enye okotopde?
4. Mkpasip akada ọnọ nso? Nte kpukpru mkpasip ekedi nti mkpasip?
5. Nso idi ntak emi kpukpru mkpasip mikọkọrike iñwum mfri?
6. Ewe mkpasip okoñwum mfri? Nso oruk owo ke ekeda oro edomo?